

Hozciz: Eu Fwen Senhconz “Cibbet Daih”

河池：用山歌宣传党的十八大精神

Mboengqneix daeuj, vihliux dawz dangj “Cibbet Daih” cingsaenz haeujlaeg senhconz daengz ndaw ginzcong bae, Hozciz Si haengjheiq gya'gvangq senhconz bingzdaiz, dawz gauhdonh lundanz caeuq beksingq gyangjanz giethab hwnjdaej, siveij senhconzbu lingjdauj guhgoek, laebbaenz aen canghfwen senhgyangjdonz ndeu, roengz lajmbanj、giyez、gihgvanh、segi、hagdangz bae, eu fwen senhconz dangj “Cibbet Daih” cingsaenz. Gyoengqde yungh 13 ngoenz seizgan bae daengz daengx si 11 aen yienh (si、gih) guh senhconz. Aeu canghfwen guh senhgyangjdonz youq Hozciz Si dwg baez daih'it, aeu fwen senhconz dangj “Cibbet Daih” cingsaenz, ginzcong dingq ndaej rox, ndaej vunzlai haenhndei, senhconz yaugoj ndei. (Liengz Cwngz)



▲ Canghfwen langhsing eu fwen.

► Eu fwen senhconz yienhciegz.



▲ Buh Bouxcuengh moqsag youh gyaunde.

Nanzdanh: Buh Bouxcuengh Gyaunde Yinx Da Vunz

南丹：壮族精美服饰醉游人

3 nyied 27 hauh, Nanzdanh Yen youq Vuzai Cin Dadi Cunh gawjhengz Ciet Caemzgvej Bouxcuengh hozdung. Ngoenzde, gyoengq ginzcong Bouxcuengh daenj buh miz minzcuz daegsaek moqsag gyaunde haenx, daj gak mbanj daeuj gvaq ciet, doengh gij buhvaq gyaunde moqsag miz minzcuz daegsaek neix, youq gwnz Ciet Caemzgvej cei q yinx lwgda bouxhek. (Fuz Lungzgyangz)

Vihliux Lwngyez Byaij Ok Ndawbya

为了孩子们走出大山

Diuz ga ndeu, diuz dwngx ndeu, aen gyangjdaiz ndeu. 19 bi daeuj, Cinz Hinghgoz lauxsae laemxsim youq ndaw bya sonsaw, de yungh aensim ndatfwgfwg de, bae bang gyoengq lwngyez ndawbya saedyienh aen lijsiengj “cihsiz ndaej gaijbienq minghyinh” haenx.

Cinz Hinghgoz dwg Lingzconh Yen Haijyangz Yangh Siujbingzloz Cunghsinhiz Siujyoz boux lauxsae ndeu. Aen zozyau neix miz 15 boux hagseng, baen 4 aen bangaep, de cawzliux sonsaw, moix ngoenz lij bang hagseng cawj haeuxringz, dwg bouxlauxsae youh dwg bouxdajcawj, Cinz lauxsae mbouj ienq saek coenz vah, de naeuz: “Hawj gyoengq lwngyez hag rox cihsiz, byaij ok ndawbya, dwg aen maqmuengh gou!”

(Luz Boh'an)



▲ Cinz Hinghgoz lauxsae cingq son hagseng guh cozyez.

Gvanyangz: “Ciet Hongdawz” Caeuq “Ciet Lijyouz” Ndeiyawj Raixcaix

灌阳：“农具节”和“旅游节”精彩纷呈

3 nyied 19 hauh, 2013 Gvanyangz Yen Cenhgyahdung Yauzcuz Vwnzva Ciet Lijyouz nem Gvanyangz Yen Ciet Hongdawz youq Gvanyangz yienhsingz gawjhengz. Ngoenzde, daengx aen yienhsingz Gvanyangz vunz lai vunz daih, gyoengq beixnuengx daj gak dieg daeuj doxcomz, guh gak cungj gak yiengh guh'angq hozdung, angqhoh song aen ciet neix, nauhyied dangqmaz. Liggaeuq ngeih nyied cobet “Ciet Hongdawz” dwg Gvanyangz Yen aen ciet conzdungj ndeu, gaenq miz 100 lai bi lizsij. Hainduj, dwg gyoengqvunz youq ngoenzneix daeuj Muihyinzdaiz Gvanyangz sauyieng baiq baed, ganj hawmih, aenvih ngeih nyied cobet cingq dwg seiz ndaemcin doekcin, gyoengqvunz couh youq ganj hawmih seiz gai cawx hongdawz, miz gai hanz、gai loz、gai aencae aenrauq. Ngoenz ngeih nyied cobet couh ciemhciemh baenz le “Ciet Hongdawz” Gvanyangz. Daj 2009 nienz hwnj, “Ciet Hongdawz” yungzhaej ndaw vwnzva lijyouz dangdieg, bouxhek daeuj youz hix yied daeuj yied lai. (Liuz Gyaucingh)



Cauhbingz Gawjbanh Cazvuengz Doxdax Hozdung

昭平隆重举行茶王节比赛活动

3 nyied 29 hauh, Cauhbingz Yen youq Coujmaj Yangh gawjbanh 2013 Cauhbingz Yen Cazvuengz Doxdax Nem Ciet Swnghdai Vwnzva Lijyouz Hozdung. Cazvuengz doxdax neiyungz dwg “doxdax mbaet caz” caeuq “doxdax guhcaz”. Miz 27 boux camgya doxdax. Cauhbingz Yen Denhcwngz Swnghdai Nungzyez Gunghswih bouxsensouj Dangz Gveifung aeu ndaej “bouxvuengz mbaet caz” cwnghauh. Byawz ndaej bingzguh “bouxvuengz guhcaz”, daengz 4 nyied 11 hauh Cauhbingz Yen guh Ciet Cazvuengz vanjvei cij dwen vunzlai rox. (Liuz Feih)



▲ Bouxsensouj beij guhcaz.



▲ Bouxsensouj beij mbaet caz.